



宛陵先生文集目錄卷第七

汝州後詩

夏日晚霽

永叔寄澄心堂紙

聞尹師魯赴涇曠

夏日陪彭學士登城

王殿丞求釣竿

詠蜘蛛

宋著作寄鳳茶

觀水

大水後城中作

和李君讀余注孫子

新霽登周王城

答李晉卿結交篇

秋日屬疾

田家

苦雨

聞永叔復館寄賀

九月一日

弔李膺辭

送李都監赴武當

重送

田家語

檢覆葉縣魯山田

卧羊山

汝墳貧女

昆陽城

老牛陂

雙鳧觀

葉公廟

悲已卯歲謝紫薇

觀扱兔

燈花

魯山山行

游元紫芝琴堂

至香山寺報秀叔

寒草

送崔秀才

思遠寄師厚

送師厚歸南陽

疲馬

和永叔冬夕聯句

古塚

仲春同師直雪中

和師直雪中馬上

和師直早春

和師直晚步

暮春過洪氏小園

雷祕校入闕擬官

登許昌城

孫主簿惠墨跡

寄永興夏太尉

桓妬妻

目錄終

宛陵先生文集卷第七

夏日晚霽與崔子登周襄故城

雨脚收不盡斜陽半古城獨携函客步閑閱老農
耕寶氣無人發陰蟲入夜鳴余非避喧者坐愛遠
風清

永叔寄澄心堂紙二幅

昨朝人自東郡來古紙兩軸絨滕開滑如春冰密
如蠶把玩驚喜心徘徊蜀牋脆蠹不禁久刻楮薄
慢還可咍書言寄去當寶惜慎勿亂與人翦裁江
南李氏有國日百金不許市一枚澄心堂中唯此

物靜几鋪寫無塵埃當時國破何所有帑藏空竭
生莓苔但存圖書及此紙輦大都府非珍瓌于今
已踰六十載弃置大屋墻角堆幅狹不堪作詔命
聊備麤使供鸞臺鸞臺天官或好事持歸祕惜何
嫌猜君今轉遺重增愧無君筆札無君才心煩收
拾乏匱積日畏捨裂防嬰孩不忍揮毫徒有思依
依還起子山哀

聞尹師魯赴涇州幙

胡騎犯邊來漢兵皆死戰昨聞衛將軍賢俊多所
薦知君慮不淺永對未央殿天子喜有言輶車因

召見籌畫當冕旒袍魚賜銀苗曰臣豈身謀而邀
陛下睽青衫出二嶠白馬如飛電関山冒風露兒
女泣霜霰軍容壯士多劔藝匹夫街賈誼非倍儒
慎無輕寡變

夏日陪提刑彭學士登周襄王故城

聊隨漢使者一上周王城片雨北郊晦殘陽西嶺
明野禽呼自別香草問無名誰復黍離詠但興
箕穎情

王殿丞赴莫州日就余求釣竿數莖以往
今因其使回戲贈

去日覓釣竿定能垂釣否若不暇釣魚釣竿當去取

詠蜘蛛

日結一尺網知吐幾尺絲百蟲為爾食九腹常苦飢

宋著作寄鳳茶

春雷未出地南土物尚凍呼譟助發生萌穎強抽
其團為蒼玉璧隱起雙飛鳳獨應近臣頒豈得常
寮共顧茲實賤貧何以叨贈貢石碾破微綠山泉
貯寒洞味餘喉舌甘色薄牛馬潼陸氏經不經周

公夢不夢雲脚倍所珍烏觜誇仍衆常常濫盃甌
草草盈罍瓮寧知有奇品圭角百金中祕惜誰可
邀虛齋對禽哢

觀水 并序

庚辰秋七月汝水暴至溢岸親率縣徒以土塞郭
門居者知其勢危皆結庵于木末徬徨愁嘆故作
是詩

秋水漫長堤郊原上下迷孤城閉板築高樹見巢
棲耳馱蛙聲極漚生雨點齊渚間牛不辨誰為掃
陰霓

大水後城中壞廬舍千餘作詩自咎

不如無道國而水冒城郭豈敢問天災但慙為政
惡湍迴萬瓦裂槎向千林閣獨此懷百憂思歸卧
雲壑

依韻和李君讀余注孫子

我世本儒術所談聖人篇聖篇關乎道信謂天地
根衆賢發蘊奧授業稱專門傳箋與注解璨璨今
猶存始欲沿其學陳跡不可言唯餘兵家說自昔
罕所論因暇聊發篋故讀尚可溫將為文者備豈
必握武賁終資仁義師焉愧道德藩揮毫試析理

已厭前輩繁信有一日長可厭千載寃未涉勿言
淺尋流方見源廟謀盛夔尚正議滅烏孫吾徒誠
合進尚念有親尊

新霽登周王城

行行古城頭歷覽古城下水鳥傍人煙河流隔桑
柘秋山豁晴翠野老親時稼民訟今已稀閑登厭
官舍

依韻答李晉卿結交篇

上交執正道下交守奇節當為蘭死香勿作竹枯
裂試看溫玉堅何似春冰折貴賤事乃見古今情

不別平生相與親
晏歲誰可決君能持此意足以
表風烈

秋日屬疾

體羸易生疾况乃凌秋陰微寒薄膚腠飲藥增衣
衾一日失所治百骸將不任當從華氏學聊欲為
戲禽

田家

高樹蔭柴扉青苔照落暉荷鋤山月上尋徑野煙
微老叟扶童望羸牛帶犢歸燈前飯何有白薤露
中肥

苦雨

秋空幾旬雨四海低鵬翮晝不見日精夜不見月
魄洒盡天漢流蒸爛女媧石塗潦將埋輪牛馬困
負輓羣蟲無土蟄百果就枝坼安能誅陰虬坐使
天地闢

聞永叔復館因以寄賀

東方有鍛禽已喜羽翰插重來金馬門莫忘黃牛
峽黃牛無冬春遠水生鱗甲今非昔日憂賀酒特
新墜

九月一日

去歲南陽與謝
公別今謝已沒

授衣念徂節闔棺傷故人故人昔送我把酒湍水
濱只道後期易豈知無會因死生意不及欲語鼻
先辛既之羨門術安得如松筠寒暑更數十應亦
同埃塵

弔李膺辭

陰蜺橫天長劔欲抉匣頽未露兮精鋼已折層冰
塞川猛炬方烈凝氣未銷兮高焰已滅雖忠毅之
有志兮當衰運之閉結嗟身禍之不免兮甘就死
於縲紲何賢者之景慕兮或自表而謝絕惟荀公
之獲御兮見顏間之氣悅奚服媚之若茲兮盍操

秉平峻節風裁獨高而罕接兮號龍門而無凡轍
允簡充不容於時兮玉雖碎而猶潔痛漢綱之頽
圯兮又何毀乎賢哲歷千古而可悲兮故余不得
而面結叨此邦而長民兮過舊隴而增咽嗟異代
之有遇兮若登履乎閭闌對風樹之蕭蕭兮想
冤氣之未竭聊感槩於斯兮寫憂心之愒愒

送李康伯赴武當都監

城下漢江流滄波照鬢秋山川包楚塞風物似荆
州試聽清砧發何如畫角愁遙知絕戎事水味有
槎頭

重送

得朋如得寶何恨相知晚舊友貴來踈嗟君行復
遠秋城隔寒水驛路入蒼巘古情深不深所祝加
餐飯

田家語

庚辰詔書凡民三丁籍一立校與長號弓箭手用
備不虞主司欲以多媚上急責郡吏郡吏畏不敢
辨遂以屬縣令互搜民口雖老幼不得免上下愁
怨天雨淫淫豈助 聖上撫育之意耶因錄田家
之言次為文以俟採詩者云

誰道田家樂春稅秋未足里胥扣我門日夕苦煎
促盛夏流潦多白水高於屋水既害我菽蝗又食
我粟前月詔書來生齒復板錄三丁籍一壯惡使
操弓韜州符今又嚴老吏持鞭扑搜索稚與艾唯
存跛無目田間敢怨嗟父子各悲哭南畝焉可事
買箭賣牛犢愁氣變久雨鐺缶空無粥盲跛不能
耕死亡在遲速我聞誠所慙徒爾叨君祿却詠歸
去來刈薪向深谷

檢覆葉縣魯山田李晉卿餞於首山寺留別

我本山水鄉看山常不足自從到官來塵事便拘

東嘗聞此山寺法宇深雲木無由一來過夢想向
巖谷案田趨隣壇跨馬涉平陸良久送我行偶與
賞心屬禪庭鳴白雞祖席歌黃鵠野氣逼人寒嵐
光添酒綠言離非遠離但愛交情篤重游應有期
君亦行車促

卧羊山

亂石若羣羊緣崗卧斜日曾非左慈化更想初平
叱無羶穴蟻去有乳寒泉出誰憶灞陵原纍纍冢
傍質

汝墳貧女

時再照弓手老幼俱集大雨甚寒道死者
百餘人自壤河至昆陽老牛陂僵尸相繼

汝墳貧家女行哭音悽愴自言有老父孤獨無丁
壯郡吏來何暴縣官不敢抗督遣勿稽留龍鍾去
携杖勤勤囑四隣幸願相依傍適聞閭里歸問訊
疑猶強果然寒雨中僵死壤河上弱質無以託橫
尸無以葬生女不如男雖存何所當拊膺呼蒼天
生死將奈向

昆陽城

試看昆陽下白骨猶啣鏃莫願隍水頭更添新鬼
哭

老牛陂

吳牛行歌老漢馬焉得肥筋力不可恃遊子當念
歸

雙鳧觀

山下溪流照城郭幽庭栢子風自落古壇蒼蘚少
人行不見雙鳧見黃雀

葉公廟

兵物還見驚從來人所悼今看古壁畫應合當時
好

已卯歲紫微謝公赴南陽過葉縣陪遊興
慶精舍題名壁間而去庚辰歲余求按田

因訪舊跡盡然于懷故作此謠以志其悲
昔與南陽太守行車騎休時訪庭栢今來重看壁
間題太守已為泉下客獨流清血是門人悵悵便
令生死隔

觀救兔

莽莽蒿萊下紛紛狡兔迷枯栢坐守者若箇是忘
歸

燈花

灼灼生寒燼終朝照席明從教占有驗燃滅本無
情

魯山山行

適與野情愜千山高復低好峯隨處改幽徑獨行
迷霜落熊升樹林空鹿飲溪人家在何許雲外一
聲雞

游元紫芝琴堂

訪古歷荒城城孤落日鳴人琴雨不見破月高臺
傾

至香山寺報秀叔

家近心還速川長馬易疲望山孤寺出渡水夕陽
遲來向林間宿歸須月上時只應庭際鵲已報汝

先知

寒草

寒草纔變枯陳根已含綠始知天地仁誰道風霜
酷

送崔秀才

晨風無定巢遠寄鷦鷯枝天寒鼓翼健粒食寧所
窺大澤多羣羽翱翔各有時今子振衣去焉能久
迎羈

少年遊太學着盡篋中衣獨劔自為伴無家何處
歸秋蓬隨野轉寒鵲遶林飛霄漢有知己行行寧

久微

思遠寄師厚

馬蹄踐霜雪不畏道路寒游子重衣裘慈母懸心
肝懸心幾千里冉冉歲已殘大河今漸涸遠日常
不乾度鴈朝夕聞尺書寄亦難願同車輪復勿比
弦上丸

送師厚歸南陽會天大風遂宿高陽山寺

明日同至姜店

往日送子春風前春風酣酣杏正妍今來送歸秋
風後秋風撼撼沙滿川馬鬣斜傾毛瑟縮馭吏噤

噙足後先弊裘吹裂寒入骨枯株磨戛火欲燃忽
逢古寺出崑腹與君下馬相留連殿堂高下就山
勢松栢森聳侵雲巔長廊落葉卷若掃丈室垂幔
翻如褰像塑神母乳九子抱携撫玩皆可憐却令
遠客自生念欲見幼稚心煩煎擁爐對坐日昏黑
龕燈共借僧榻眠雖然覆衣冷如鐵不及在家貧
無羶曲肱難寐要天曉兩股凍痺仍筋攣根根殘
夜木魚響起看昂畢傾西躔怒號斗息東方白童
僕肅整吾將還老僧掃壁持筆硯請予強此題歲
年出門並轡至山店茅屋揭盡餘尺椽又據胡床

一談笑君不解飲聊開筵程次都無五百里篋中
可之一囊錢拂衣頻起畏日曷應恐慈母心懸懸
顧我便當江海去却思此地何由緣

疲馬

疲馬不畏鞭暮途知幾千當湏量馬力始得君馬
全

依韻和求叔子履冬夕小齋聯句見寄

遙知夜相過對語冷無火險辭闕尖竒凍地抽筭
箚吟成歎寄誰談極唯思我學術窮後先文字少
許可敢將蠡測海有似脂出輒必餓嘗見憂此病

各又果弊駕當還都重門不須鎖到時春怡怡萬

柳枝娜娜定應人折贈只恐絮已墮行橐且不貧

明珠藏百顆永叔嘗見嘲謂自古詩人率多寒餓顛困
屈原行吟於澤畔蘇武啗雪於海上杜甫凍

餒於耒陽李白窮溺於宣城孟郊盧仝栖栖道路以子之才
必類數子今二君又自為此態而反有飯顆之請何耶

古塚南陽道中作此以下汝州
罷官再至鄧州葬希深

南陽古原上荒塚若魚鱗劍佩不為土衣冠應化
塵枯骸託魑魅細草沒麒麟何必問名氏漢家多
近親

仲春同師直至壠山雪中宿穰亭

與子乘羸馬夜投山家宿風雪滿綈裘燈火深竹

屋烹雞賴主人吠犬憎倦僕明發到巖前春蕙凍
雲木

依韻和師直仲春雪中馬上

自倚春風暖輕袍犯雪來過塘迷綠水拂樹雜芳
梅山蔽峯難辨樵通徑易開野行方有味緩轡不
須催

和師直早春雪後五壠道中作

來尋谷口春正值陰雲結日暮冰霰繁宿亭孤飯
設侵晨登壠去始見羣峯列草凍未抽心松枯猶
抱節川傍認飛鷺林上墜殘雪何意待芳菲遲留

未堪折

依韻和師直晚步徧覽五壠川

窮覽川原勝經行未厭頻樵深但聞斧谷暖自留
春臨水何妨坐着雲忽滯人誰家煙塢裏竹樹遠
相鄰

暮春過洪氏汝曲小園

三月花已休閒來羨叢薄河回地勢偏雨入灘聲
惡綠草旋抽心青梅猶帶萼主人歸未歸誰省曾
遊樂

雷秘校入闕擬官時將登舟過輦下

與君先後發同走向京華美躍青驪去將乘烏榜
賒着鞭辭宿雨渡水踏春沙聞道求為縣應當學
種花

登許昌城望西湖

試望許西偏湖光浸曉煙岸痕添宿雨草色際平
田夏木陰猶薄朱荷出未圓人閑綠波靜幽鷺插
頭眠

孫主簿惠上黨寺壁胡霈然書墨迹一匣
上黨佛祠何可觀開元瑞物圖高閣又有長廊古
壁上復是名輩題丹雘當時泥用絲作筋意欲干

載無剝落書奇畫妙了不識訛傳墨土能治平瘡
寺僧不惜人搯取筆畫遂缺如鳥啄後來好事恐
磨滅寶刀裁刻泥如剝取之龕置綠板匣便寶箱
楮同美璞拂拭還看體勢生盤屈蒼虬舞鸞鶴
昔不畏屋壁壞今也常恐兒童撲夫君知我心所
重南歸贈以致誠慙此時雖喜落吾手老大腕硬
無由學但當拜賦不敢忘莫為報言曾未數

寄永興招討夏太尉代人

寶元元年西夏叛天子命將臨戎行二年孟春果
來寇高奴城下皆氏羗五原偏師急赴敵晝夜不

息趨戰場馬煩人怠當勁虜雖持利器安得強二
師覆敗乃自取豈是廊廟謀不臧朝廷又選益經
略三幙賢俊務所長或取李悝備邊策或欲五道
出朔方仲夏科民挾弓矢季冬括驢賫道糧官軍
未進復犯塞塞旗殺將何倡狂遂令士卒愈沮氣
欲使乘障膽不張我願助畫跡且遠側身西望空
淒涼庶幾一言可裨益臨風欲寄鳥翼翔所宜畜
銳保城壁轉饋先在通行商守而勿追彼自困境
上未免小敝攘譬如蚊虻嗜膚體實於肌血無大
傷此言雖小可喻遠幸公采用不我忘誠知公慮

若裴度聖上聽用同憲皇當時豈不歷歲月猶且
衆鎮未陸梁況今鷹犬乏雄勇便擬馳騁徒蒼惶
且緩湏時勵犀卒終期拉朽功莫當

桓妬妻

昔聞桓司馬娶妾貌甚都其妻南郡主悍妬誰與
俱持刀擁羣婢逕往將必屠妾時在窻前解鬟臨
鏡梳鬢髮雲垂地瑩姿冰照壺妾初見主來縮髻
下庭隅斂手語出處國破家已殂無心來至此豈
願奉君娛今日苟見殺雖死生不殊主乃擲刃前
抱持一長吁曰我見猶憐何況是老奴盛怒反為

喜哀矜非始圖
變忌尚服美傷哉
今亦無

宛陵先生文集卷第七

宛陵先生文集目錄卷第八

汝州後詩

夏日晚登許昌湖

許昌晚晴

故原戰

故原戰卒死復蘇

西湖閑望

寄謝師直

感二鳥

古相思

舟次寄故人

送曇穎往廬山

弔石曼卿

醉中留別永叔子履

汴水斗減寄彥國

陪遊女郎臺寺

望仙亭

陪遊莊生臺

淮上雜詩六首

赴雲任君有詩

宋諫議遺白鵝

金山寺

瓜洲對雪

金山二僧携茗至

淮南遇梵才上人

送櫟陽朱宰

和長吉上人相遇

歲日旅泊

寄題梵才安隱堂

農難

舟中值雨

題刁經臣山居

和訓裴君見過

甘露寺

和刁經臣有感

春日舟中對雪

和達觀禪師見寄

和刁太博新墅十題

發陶莊

發丹陽後寄徐元興

湖州後詩

胡武平遺牡丹

題滕學士書堂

送劉成伯還都

送舍弟赴都

訪報本簡長老

答祝秘校見寄

目錄終

目錄

宛陵先生文集卷第八

夏日晚晴登許昌西湖

新晴萬柳齊鶯度水東西城上明殘照雲間挂斷
霓煙蒲勻若翦沙岸淨無泥菓馱繁枝重人乘小
駟低嵐光開翡翠湖色浸玻璃只欠朱藤密如過
菴畫谿

許昌晚晴陪從過西湖因詠謝希深蘋風
詩愴然有懷

疎雲漏斜照殘雨葉間明飛蓋城頭去澄湖水正
平荷盛鮫客淚蔓濯野人纓公獨思康樂臨流誦

句清

故原戰

落日探兵至黃塵鈔騎多邀勲輕赴敵轉戰背長
河大將中流矢殘兵空負戈散亡歸不得掩抑泣
山阿

故原有戰卒死而復蘇來說當時事

縱橫尸暴積萬殞少全生飲兩活胡地脫身歸漢
城野穉穿廢竈妖鵬嘯空營侵骨劍瘡在無人爲
不驚

西湖閑望

夏景已多趣湖邊日更佳園葵雜紅紫岸柳自歌
斜雨氣收林表城陰接水涯愛閑輸白鳥盡日立
汀沙

寄謝師直

憶同仲春月冒雨過穰亭聊酌山酒別獨吟夜燈
青明朝上嶺路群岫張雲屏忽入川谷秀固非平
生經綠竹間紅蕖紫藤垂千肩春塘水泱泱野老
髮星星田父相與至里言尚可聽始聞丹砂峯
識五壠形傍瞻禹湯迹競信廟貌靈邀我陟巉巉
宿霧方冥冥晴露衣裘濕時襲草木馨棟宇敞絕

頂牲酒列幽亭竹杯占禍福巫錦醉一噀日晏別
雲外月出至近垆僕夫疲不進鞭策無暫停我馬
忽顛墜君心同鵲鴿再駕體無傷扣關燭已熒自
茲期莫逆未契心所銘忽忽操行袂沉沉如水萍
今來各一方安得同醉醒

感二鳥

雄雌雙好鳥託棲空樹中有蛇出傍穴噴毒氣如
虹半夜此驚飛瞥去隨西東有喙不能達啼雲復
嘯風迴翔隔歲月老木高童童眼生衆禽噪雖近
未由通昨朝煙雨晦並翼向幽叢鷹鷂尚橫集颺

颺意無窮

古相思

劈竹兩分張情知無合理織作雙紋篔依然浹花
紫浹花雖復合疑岫幾千里欲識舜娥悲無窮似
湘水

舟次朱家曲寄許下故人

藹藹桑柘岸喧喧鷄犬村晚雲連雨黑秋水帶沙
渾稍聽隣船語初分異土言雖嗟遠朋友日喜近
田園

送曇穎上人往廬山

潯陽幾千里無不見爐峰蒼翠入衆目崑壑少行
蹤高僧忽獨往杳杳懷遠公嘗聞虎溪上醉令或
來同而今競邀致幾里聞松風塵心古難洗瀑布
垂秋虹

弔石曼卿

前時京師來對馬嘗相揖埃塵正滿衢笑語曾未
及雖然恨莫親往往聞風什星斗交垂光昭昭不
可挹獨哦秋露中豈顧衣裘濕酒盃輕宇宙天馬
難羈繫今朝我還都但見交朋泣借問泣者誰曼
卿竟已蟄堂堂豪傑姿遂爾一棺哉君生寒月明
君沒寒月八月入還復升精鬼寧未集孤墳細草
遍翠碣嗟新立

醉中留別永叔子履

新霜未落汴水淺輕舸唯恐東下遲遠城假得老
病馬一步一跛令人疲到君官舍欲取別君惜我
去頻增喜便步髯奴呼子履又令開席羅酒卮遂
巡陳子果亦至共坐小室聊伸眉烹雞庖兔下筋
美盤實釘脰栗與梨蕭蕭細雨作寒色耿耿盡醉
安可辭門前有客莫許報我方劇飲冠幘歆文章
或論到淵奧輕重曾不遺毫釐間以辨謔每絕倒

豈顧明日無晨炊六街禁夜猶未去童僕竊訝吾
儕癡談兵究弊又何益萬口不謂儒者知酒酣耳
熱試發泄二子尚乃驚我爲露才揚已古來惡卷
舌噤口南方馳江湖秋老鱖鱸熟歸奉甘旨誠其
宜但願音塵寄鳥翼慎勿却効兒女悲

汴水斗減舟不能進因寄彥國舍人

朝落幾寸水暮長幾寸沙深灘鼉背出淺浪龍鱗
斜秋風忽又惡越舫嗟初閣坐想掖垣人猶如在
寥廓

陪淮南轉運魏兵部遊潁州女郎臺寺

舊傳媯氏女將適楚人時築館自臨水故臺空此
基因爲楚宮媵來與使車期樓上望湖上煙林晚
蔽虧

望仙亭 并序

壽春望仙亭廣平宋公所作也宛陵梅堯臣之官
吳興道出其下公命賦之

公來有餘樂所樂爲郡間訟稀聊自適靜勝以紓
顏清軒開曉幔歷歷見淮山山色洗新雨佳氣如
可攀代異雞犬去時平草木閑試望天衢近飛駕
應此還

陪淮南轉運魏兵部遊濠上莊生臺

周當戰國時何爲守靜正干戈旣日尋仁義固不
競天下皆跼徒寧知聖爲聖是將萬物齊不顧千
金聘所以忘形骸所以保性命安能小仲尼豈不
識世病我從魏公來訪古停烏榜聊識賢者心吁
嗟一長詠

淮上雜詩六首

宿雲未全斂微雨入船踈問伴失前後暝行隨疾
徐相親沙上鴈自樂水中魚亭午日光透遠分林
際居

暗開淮水平遠見孤城出出舟問舟子遽對那能
悉始聞莊生臺還想觀魚日果得真隱心魚鳥情
非密

輕舟晚投處聒聒渚禽嘶椽子隨薪束蔬科帶土
携岸幽雲滿石潮落蚌生泥客思無慘極唯將魯
酒迷

野鴈不知數翳然川上鳴曾無設羅意空自見船
驚渺渺拍波去紛紛孤嶼盈苦寒非塞外霜落夜
淮清

漠漠晝煙披縱橫見漁艇輕橈上急水或與飛鴻

並魚大釣絲微牽隨碧潭迥向晚得志歸浩謔山
月靜

舟閣下灘遲蒼黃暮灘上偏愁逆水風更駕崩沙
浪落日看已昏漁燈遠相向夜闌天轉寒坐待潮
流漲

赴零任君有詩相送仍懷舊賞因次其韻
湖山饒遠處曾省牧之遊鴈落對田闊船過菱渚
秋野煙昏古寺波影動危樓到日尋題墨猶應舊
壁土留

過楊州叅政宋諫議遺白鵝

曾遊鳳池上曾食鳳池萍乞與江湖去將期養素
翎不同王逸少辛苦寫黃庭

金山寺 并序

昔嘗聞謝紫微言金山之勝峯壑攢水上秀拔殊
衆山環以臺殿高下隨勢向使善工摸畫不能盡
其美初恨未遊赴官吳興船次瓜洲值海汐冬落
孤港未通獨行江際始見故所聞金山者與謝公
之說無異也因借小舟以往乃陟迴閣上上方歷
絕頂以問山阿危亭曲軒窮極山水之趣一草一
木雖未萼發而或青或凋皆森植可愛東小峰謂

之鷓山有海鷓雄雌棲其上每歲生雛羽翮既成
與之縱飛迷而後返有年矣惡禽猛鷲不敢來茲
以搏魚鳥其亦不取近山之物以爲食可義也
薄暮返舟寺僧乞詩強爲之句以應其請偶然而
來不得髣髴敢與前賢名迹耶

吳客獨來後楚橈歸夕曛山形無地接寺界與波
分巢鷓寧窺物馴鷗自作群老僧忘歲月石上看
江雲

瓜洲對雪欲再遊金山寺家人以風波相止
臘月海風急雪吹巖下窻輕舟不畏浪昨日過寒

江渡口復夕興區中無與雙忽牽兒女戀空聽遠
鍾撞

金山芷芝二僧携茗見訪

一遊江山上日日吟不足雙錫忽來過衣霜帶初
旭况能持茗具向此烹新綠中瀝水若飴北焙花
如粟還將塵慮滌自愧冠纓東何以報勤勤馳奴
扣雲谷

淮南遇梵才吉上人因悼謝南陽疇昔之遊
久已厭宦旅故茲歸江南始時遠辭邑不及事春
蠶殘臘猶在道險阻固所諳扁舟次淮海喜遇釋

子談契闊十五年尚謂卧嵒庵偶見如夙期淹留
良亦甘歎遊獨泫然懷悲情豈堪班班雲中鳥共
看投夕嵐曷不念舊隱山水唯素耽我從湖上去
微爵輕子男

送櫟陽宰朱表臣

塞上備胡羗關中調兵食秦民尚苦輸漢吏勤求
職君今喜懷詔馳騎寧暇息其邑嘗雨金於時豈
能得行當經灞上故事猶可憶前代多戰爭鬼火
弄陰黑蒼蒼路傍草憔悴希春色縣涂誠有政威
惠爲令德

次韻和長吉上人淮甸相遇

淮上一相遇憶在京都時雖驚歲月換未改松桂
姿童侍兩三人鉞錫相與隨自言東越來篋中多
好詩文字皆妥貼業術無傾歎前輩嘗有言清氣
散人脾語妙見情性說之聊解頤始推杼山學得
非素所師此固有深趣吾心久已知橫琴乃玄悟
豈必弄鳴絲古樂衆少聽誰知彼吹篴師曠沒世
後伯牙衆身悲願同黃鵠舉遠歸滄海涯老驥雖
不病長坂安可馳天台況竒勝日夕勞夢思尚忝
齒纓綬終年趨路岐俯愧淵中魚游泳水之湄仰

羨雲間鷺凌厲辭繁維居嘗起斯念未去情不怡
今朝更道舊感愴各頰眉同遊謝公門遠想袂露
涕惜哉胡不仁碎彼東方琪又出數紙書手澤尚
可披眷眷疇昔意於今當語誰復遺三百言玩味
自挽髭序事盡成故慨吟良有資其詞何疊疊宛
若對風規冷然聳心目不覺整冠綷重以超俗韻
顧子賤職司是猶猿鳥情並此鴛鴦卑報投仍勉
強實謬匠者爲應哂不量力短兵茲已疲

歲日旅泊家人相與爲壽

舟中逢獻歲風雨送餘寒推年增漸老未懷殊鮮

歡江邊無車馬鑑裏對衣冠孺人相慶拜共坐列
盃盤盤中多橘柚未咀齒已酸飲酒復先醉頗覺
量不寬岸梅欲破萼野水微生瀾來者即爲新過
者故爲殘何言昨日趣乃作去年觀時節未變易
人世良可歎

寄題梵才大士台州安隱堂

巢禽託靜林潛魚戀深壑豈不能自安翔泳得所
樂達士遠紛華於茲守冲漠堂前鳴松風堂後馥
花萼好鳥時一呼澄明望寥廓詩興猶不忘禪心
詎云著所以得自然寧必萬緣縛未能與之游懷

慕徒有作

農難

稂莠非所殖嘉禾共一田老農實惡之豈共時稼
捐管蔡與盜跖同氣詎能遷周公不妨聖柳惠不
妨賢賢哉彼薶矣取舍得其然

舟中值雨裴刁二君相與見過

江上滄淒淒天形接野低岸痕生舊水馬跡踏春
泥風急侵衣重山昏卷幔迷誰驚二客論不愧巨
源妻

題刁經臣山居時已應辟西幙

向不樂郡府遂云歸田園結廬復種藝草樹日已
繁散帙理舊學了然無俗喧春雨一迴過覽耕登
古原青山每自愛霽色當衡門故人苟來往名宦
未嘗言趣適已不淺道心良亦存忽聞辟書至便
令驅犢棘豈期同瓠瓜長繫蒿萊根始知古君子
出處惟義敦

前者裴君雨中見過因以詩謝復承來章

輒依韻奉和

主人門下客寂寞在江涘我昨謝銅章解組猶脫
屣前日至朱方正值春雨起君時冒雨來曾不避

泥滓林枝滴衣襟沙岸平履齒相歡了無間偶論
通遠旨去逢交親問爲報心如水

甘露寺

曾非遠城郭寂爾隔囂氛尚有南朝樹能留北固
雲川濤觀海若霜磬入江濱衛國丹青在孤堂綠
桂薰

依韻和刁經臣讀李衛公平泉山居詩碑
有感

當時植珍木豈是昧前規廢宅長春草故山存舊
碑已嗟良璧毀安識古松姿叔子每懷慕此心空

自知

春日舟中對雪寄刁經臣

誰道江南暖新春見雪飛鷗來親客艇花亂上人
衣古郡地偏寂野窻寒入微戴家仍不遠欲去未
能歸

依韻和達觀禪師春日雪中見寄

密霰來新歲春陽氣漸微侵庭草芽凍紛雜鴈行
飛江寺誰開逕湖山我欲歸雨花無六出休怪着
人衣

和刁太博新墅十題

靜舍

野木扶疎重復重塘蒲涵水綠茸茸琴書尤古得
爲樂休問前山有戴顛

西齋

靜節歸來自結廬稚川閑去亦多書請君架上添
芸草莫遣中間有蠹魚

北軒

冬日迎暄此未宜苦吟那對朔風時祇誇砌下留
殘雪不看簷間斗柄垂

叢杉

植幹森然羨在庭更憐相倚自青青翠姿且有干
雲勢豈是孤生向遠坳

松阜

勾引風聲已可聽高陰仍更接崗形知君久欲平
心氣早晚根傍長茯苓

小舫

閑撐莫厭遲比於剡艇劣相宜漕河有處通
陂水深入荷花人不知

移竹

遠愛檀欒碧逕開荷鋤乘雨破秋苔直須探作阮

家趣更向煙林缺處栽

花塢

雜芳春發淺深叢曲塢
逶迤紫間紅色賤格微應
不數少添蘭菊待秋風

綿櫓

翠色凌寒豈易衰柔條堪結更歲蕤
松身栢葉能相似勁拔緣何不自持

新井

淺淺清泉自鑑開鱗鱗寒甃未生苔
山中亭午野禽渴不畏人驚欲下來

發陶莊却寄刁經臣裴如晦

方看梅柳春共別川河上移舟人已歸
回首竹林望水渾不照影山遠猶相向
聞道欲西游漢家今尚壯

發丹陽後寄徐元輿

別君忽五年相望非一日會合如夢寐
欣喜對形質是時春已仲臨水柳未密
載酒相與遊輕舸劣容膝禪扃竹下過
乳井松間出烹茶覺暫醒岸幘情彌逸
興闌乘月歸及旦解行綵誰懷更宿醒
遠想都如失

湖州後詩

胡武平遺牡丹一盤

疇昔居洛陽看盡名園花臨水復蔭竹艷色照彤霞良友相與至競飲歡無涯而今猶老翁鬢髮但未華昨日到湖上碧水涵蒲芽此情頗已愜薄宦非初嗟況乃蒙見憐帶雨摘春葩雖無向時樂惠好仍有加

題滕學士九華山書堂

處山方畏淺曾慕結深廬要與雲峯近寧將野客踈澗苗來入俎林鳥或窺書何事輕茲樂而從出

塞車

涇公洲今為

送劉成伯還都

余昔困川途今非羨行者離心寄南風相送過平野既吹蓮葉舟更逐桂條馬中州多故人懷抱幸君寫

送舍弟正臣赴都

吳兒能刺舟其駛劇飛鳥行行固莫留望進前山小家貧吾不憂身計爾自了何當還里門拜慶期秋杪

訪報本簡長老

比泛茗溪來初逢下山雨雨收精舍出喜與高僧
語門臨水若鑑萬象皆可觀清淨欲誰隣野蓮無
處所

依韻答淮南祝秘校初春見寄

客有袖中書初憑春鸞寄春鸞不時來秋鴻今始
至水落蒲藻寒悠悠江浦意

宛陵先生文集卷第八

宛陵先生文集目錄卷第九

湖州後詩

和胡武平懷京下

和武平望太湖

和武平憶玉晨觀

凝碧堂

送劉著作弋陽宰

冬雷

送成伯遺建旌

冬日送暹上人

和宋待制九題

和說上人見訪

雪中訪烏程李宰

送劉比部

贈月上人彈琴

陪武平遊西余

和武平茗雪二水

和武平昇卞二山

送崔主簿赴青溪

和劉比部留別

送潘供奉承勛

荅新長老詩編

題劉道士奉真亭

和烏程李著作四首

送簽判張秘丞

送弟和州幕

寄題徐都官假山

送吉上人歸天台

次荅公度

留題可及明心堂

陪武平游卞峯亭

送張舍人

劉彛秀才歸江南

送胡武平

迴陳郎中詩集

和武平別後見寄

蘄州廣濟劉主簿

和僧夏日閑居

和李宰秋思

送儲令赴樂昌

隱真亭

說上人遊廬山

和元之述夢

荅恭上人

和守賢晚秋書事

目錄終

宛陵先生文集卷第九

依韻和胡武平懷京下游好

南國易悲愁西風起高樹枯荷復送雨度鴈寧知
數欲問北來音繫書復若故冥飛杳無跡弋者徒
有慕況在白蘋洲而懷石渠署石渠多故人鷓鴣
方騫翥鏘鳴尚可希綵翼何由附主人賴知己未
變疇昔顧乘桴豈仲尼好勇非季路幸依南郡帳
不學邯鄲步自守終日愚都忘向時慮睽戀此江
湖親年當喜懼既獲庭闈近又多山水趣邇來對
明月千里猶會晤長橋人絕聲舉酒逢秋露迥聞

孤舟笛煙水在何處俯檻意無涯
跳波魚夜乳頗得真隱情
奚須慕巢許思寄梅枝香遠隔
蘭溪渡緘之付好風精爽亦隨去

依韻和武平九月十五日夜北樓望太湖

東吳臨海若看月上青冥河漢微
分練星辰淡布螢細煙沉遠水重
露裛空庭孤坐饒清興惟將影對形

依韻武平憶玉晨觀

世路多氛垢人間浪逐名是非還
自喻寵辱固堪驚薄宦真何戀丹砂
儻可成終尋谷口隱鄭子豈

其卿

凝碧堂

始至荷芰生田田湖上密復當花競
時艷色凌朝日今來蓮已枯碧水墮
秋實更待雪中過群峯應互出樽有
綠蟻醅俎有頽壺橘可以持蟹螯逍遙
此居室

送劉成伯著作赴弋陽宰

我昨之官來值君爲郡掾當年已知名
是日纔識面未久嗟還都始應羣公薦
遂除芸省郎出治江上縣縣劇素所聞
其俗到可見水精製盤盃去冰

瑩產郊甸鳴箏斲桐梓雕飾雜寶絢有藥化銅鈆
方士多伏鍊君今齒尚壯好學常不倦二者定非
惑吾言亦狂狷絃歌將有餘幸可窮經傳歸來期
著書篋楮盈百卷莫學此踈慵無能守貧賤明朝
君當行勉勉自出餞豈無一壺酒豈無一鼎饌

冬雷

上帝設號令隱其南山下震發固有時曷常事憑
怒春以動含生夏以奮風雨冬其息不用藏在黃
厚土我今來江南歲曆惟建午如何小雪前向曉
疑鳴釜蛟虵龜蟲厄鱗裂口塊吐蝦蟆不食月深

窟僵兩股天公豈物欺若此汨時序或言非天公
實乃陰怪主嘗觀古祠畫牛首推連鼓黑雲雜狂
飈相與爲肺腑是不由昊穹安能順寒暑吾因考
厥事復以驗莽鹵市井欺量衡定知不活汝元惡
逆大倫弗加霹靂斧此豈曰無私故予未所取必
恐竊天威似將文法侮焉顧五行錯詎畏萬物覩
欲扣九門陳恨身無鳥羽

劉成伯遺建州小片的乳茶十枚因以爲荅
玉斧裁雲片形如阿井膠春谿闔新色寒籜見重
包價劣黃金敵名將紫笋拋桓公不知味空問楚

人茅

冬日送暹上人

霜風刮地如刀鍊，鳥不遠飛魚已潛。
何況削髮冷入骨，草屨不畏冰雪霑。
緣山涉水去幾里，晝鉢野飯誰來添。
毗陵舊寺苦欲到，索我贈行無久淹。

和壽州宋待制九題

熙熙閣

初日照城樓，流暉及菌閣。
上收花霧紅，下見春煙薄。
信美是殊邦，而淹佐時略。
自慙江外人，敢慕淮南作。

春暉亭

卉木日已發，中圃日已嘉。
歡言樂和景，及此鬢未華。
春風實無幾，凌亂枝上花。
山陰況暮月，俯仰誠可嗟。

白蓮堂

蟋蟀在秋堂，芙蓉出深水。
浩露同一色，澄澈寒鑑裏。
佳人恥施朱，欲與天真比。
沙鳥閑且都，誰將擬公子。

式宴亭

從事誰獨賢，而來均宴喜。
幽禽雜嘯呼，珍木竟叢

倚興將物色俱閑
馱簫鼓美寧同
不聞問訟息時
遊此

秋香亭

高軒盛叢菊可以泛綠樽
餘甘自同薺忘憂寧用
萱有木皆剥實何草不陳根
獨此冒霜艷芬郁滿
中園

狎鷗亭

羣生自知機不可欺
以異此雖鷗與馴鷗亦魚所
避坐熊臨碧水安得同一致
然此海客心還應無
有愧

齊雲亭

城隅結危棟
髣髴凌煙霓
平觀飛雨來
俯窺巢禽
棲浩蕩孤思發
幕歷蔓草齊
長安去不遠
何言西
北迷

美蔭亭

野材仍翦茅
當此茂林下
晴暉葉上明
翠影盃中
瀉鮮風時颭
颭輕裾自蕭
洒固殊嵇生
鍛曷慕崑
栖者

望仙亭

嘗聞淮南王
雞犬從此去
至今山頭石
馬跡尚有

處使君辭從官終日絕塵慮望望雲漢間想見賓
天馭

依韻和僧說上人見訪

客從東國來山雲猶在屨是時正窮臘鴈落溪陰
暮投宿古城隅雪迷松下路衣楮足蘭茝相過寧
猷屢

立春前一日雪中訪烏程宰李君俞尋有

詩見貺依韻和答

粉絮先春拂面翔臨風躍馬到君堂縣民將喜土
膏起令尹未驚農事忙疾呼小吏具山酌便欲盡

醉爲詩狂我牽塵俗不得久何意更煩投夜光

送劉比部

青山夜來雨溪水已潺湲侵曉桂旗動傷離蘋渚
前百壺臨祖道兩槩破春煙舊業西河上歸心向
日邊

贈月上人彈琴

人閑溪上橫剗木素琴寒倚一枝玉吳王城畔鑠
深房月下空彈孤鴈曲

冬日陪胡武平遊西余精舍

侵晨霜氣嚴溪口冰已合烏榜將進遲寒篙旋摧

拉遙看松竹深雪屋藏山衲登臨興都盡薄暮
清雲

依韻和武平茗雪二水

昔愛伊與洛今逢茗與雪南郭復西城曉色明於
甲塵纓庶可濯白鳥誰來狎落日潭上歸魚訝自
相答

依韻和武平昇卞二山

北峯巖城蒼南岫綠溪綠誰知昔人遊尚想叢桂
馥鳥獸安可羣呼鳴自為族儻聞羨門術一躡塵
外躅

送崔主簿赴睦州清溪

舟輕不畏險逆上子陵灘七里峽天翠千重雲木
寒古祠鳴野鳥亂石激春湍正與高懷愜寧歌行
路難

依韻和劉比部留別

春雲已泊簾濃淡半晴天沙草微抽綠林枝遠帶
煙况茲逢晚景那更送歸船苦酒聊為酌無勞辨
聖賢

送潘供奉承勛

與君迹熟情已親欲將行邁聊感人舉酒不能効

時俗半辭苦語資立身長大實好帶刀劍曷不往
助清邊塵門戟雖高豈自有當思乃祖為功臣所
宜勇躍發竒策嘉名定體庶得真儻以斯言作狂
說乘肥食脆任青春

荅新長老詩編

江東釋子多能詩窓前樹下如蟬嘶朝風暮月只
自老建安舊體誰攀躋唯師獨慕陶彭澤竒蹟仍
收王會稽嘗示余右一軸此焉趣尚已不淺更在措意
摩雲霓

題劉道士奉真亭

降真沉水生爐煙扣齒曉漱華池泉心存崑閬未
可到夜瞻北斗何聯聯顧茲虛室如有遲一草一
石幽且妍芝蓋雲軒杳無至不知誰更似楊權

依韻和烏程李著作四首

縣署西園

春入西園何苦誇我曾狂醉洛城花如今老大都
無興獨坐晴軒看落霞

雪上二首

共愛雪溪風物美春來清可鑑鬚眉頻生楚客將
歸日花暖吳蠶始浴時臨水竹樓通市陌跨橋雲

屋接川湄盡舩載酒期君醉已是無謀助翦夷
靚粧艷服遊川上簫鼓聲中俗自歡寄語春風休
用惡恐教潭水起波瀾

早春遊南園

東國春歸早南園百卉宜萱芽開翠穎杏萼破煙
姿青壠將鳴雉喬林未轉鸝石尤風莫起芳物畏
君吹

送簽判張秘丞赴秀州

江鷺歸時君亦歸鷺巢未暖君還去去去溪邊楊
柳多正值清明欲飛絮競折贈行何所益時當長
養傷嘉樹不如舉酒對青山酒罷移舟須薄暮嘉
禾主人余久知跡冗不擬強攀附儻或無忘問姓
名爲言懶拙皆如故

送弟赴和州幕

夾河爲郡不如古江北江南作冗官須記長傳一
經訓雖貧莫改飲瓢歡歷陽況與吾廬近春穀休
言問膳難此日停舟聊舉酌明當水驛自加餐

寄題徐都官新居假山

太湖萬穴古山骨共結峯嵐勢不孤苔徑三層平
木末河流一道接墻隅已知谷口多乾藥祗欠林

間落犹颺誰侍巾構此遊樂里中遺老肯相呼

送梵才吉上人歸天台

頃余遊鞏洛值子入天台當時羣卿士共羨出氛
埃徃再踰一紀却向人間來問子何爲爾言興般
若臺雖將發愚闇般若安在哉此教久已熾增海
非一盃我言亦爇火豈使萬木灰蓋欲守中道焉
能力損裁子勿疑我言遂以爲嫌猜忽聞携筇錫杖
思向石橋迴城霞與琪樹璨璨助詩才嘉辭徧人
口幸足息巖隈

公度以余嘗語洛中花品而此邦之人多不

敢言花於余今又風雨經時花期遂過作詩
以見貽故次其韻

去年三月來吳中欲擬看花無與從今年二月花
偏早發作無節雨與風前時晴明要尋賞謂夸洛
陽多不容我心豈是限南北美好未必須深紅姚
黃魏品若盡有春色定應天下空因君見贈又及
此莫怪還思澗水東

留題可及明心堂

秭雉已先嗥卉木萼漸歇俯檻弄條枚因心悟生
滅上人本高胄季父踐清列而能馱紛華樂彼方

外說

陪武平游雅上人房卞峯亭

晚愛池上清羣峯對簷隙常恐雲氣生坐令蒼翠
隔復繞曲塘陰映實孤花拆誰知禪者居來伴使
君適

送張舍人自安吉移宰同安

遠辭湖上山徙治海邊邑機杼吳俗饒魚蝦越人
給操琴在更張殊土宜順襲何以贈勤勤薄言茲
所及

劉彛秀才歸江南

鳳鳥不在筴麒麟寧受軒君思此二物中夜忽興
歎况值南風來襲蘭歸楚岸

送胡武平

來見江南昏使君詠汀蘋再看蘋葉老汀畔送歸
人人歸多慕戀遺惠在茲民始時繞郊郭水不通
蹄輪公來作新塘直抵吳松垠新塘建輿梁濟越
脫輶仁言度新塘去隨跡如魚鱗從今新塘樹便
與蔽芾均我雖備僚屬筆舌敢妄陳因行錄所美
願與國風振

迴陳郎中詩集

嘗觀陳伯玉感遇三十篇矯矯追古道粲爾日星
懸今公豈其後佳詠久已傳憶爲童子日早誦錦
繡妍茲來預官屬而許玩竒編明珠三百琲一一
徑寸圓他人握中有未獲毫髮焉家貧敢懷寶况
近驪龍淵又畏風雨作神物不得全再拜捧明月
長跪還席前

依韻和武平別後見寄

溪遠檣危一望遙此馬悽絕府中僚已同鴈鴛依
清淺共看鸞皇上沈寥別岸無端縈細柳迴舟不
忍過新橋醉來事事能生感誰道愁腸酒易銷

蘄州廣濟劉主簿

相識雖非久相親似舊年論文君豈後尚齒我慙
先慣狎吳兒水將浮楚客船安知不離恨高柳正
鳴蟬

依韻和僧說夏日閑居見寄

城郭非清涼山僧抱微疾又况三伏時當茲一禪
室炎飆正爍爍溪水徒瑟瑟唯詠冰雪辭可以銷
夏日

依韻和李宰秋思

一葉與風舞已知天地情將令百菓實競振群蟲

聲陶令欲收林幽人思誓觥更吟君麗句誰爲寫
鐘評

送儲令赴韶州樂昌

嘗聞韶石下虞舜古祠深至樂久已寂況持陶令
琴炎方不道遠一去值秋霖

隱真亭 烏程史尉署

作尉慕吾祖吾祖非得時誰似芙蓉國日見芙蓉
披涼雨隨風來清香入酒卮自得真隱趣不慙吳
市爲

說上人遊廬山

夙懷高世趣固足林壑情欲遊名山徧遂爲廬岳
行又訪遠公蹟東林氣象清瀑布秋影落香爐曉
煙生洗蕩萬古慮薰蒸千載名我今滯孤宦空羨
瓶錫輕

和元之述夢見寄

高秋枕席涼晝寢還清曠不嘲君腹便獨夢予爾
訪豈忘相規言仍記群小謗始知端正心寐語尚
不誑懞况何讒人告子亦孟浪吾聞有尸蟲伺惡
多相尚耽睡受其惑子心恐成恙勉子守庾曹勿
使茲物王寃交昧聰明寤後成清唱誦玩自省循

徒爾增悵悵不能檢細微遂使言屢貶雖然甚頑
鄙內顧無過當仲尼稱天厭季路猶行行何當謝
勤誠爲子傾嘉釀

秋日卧疾恭上人來過不及見因以詩答

溪上秋霧多溪居曉寒入呼吸遂生痾嘔泄不下
粒素知江南地大率皆卑濕久從吳土居氣候非
所襲伏枕欲經旬冠帶粘已澁女奚特扣關問疾
提山笠我非金粟身寄謝何暇揖屈性茲不能他
時冀來及

依韻和守賢上人晚秋書事

秋霧鬱不開矇矓夾溪樹深枝尚宿禽寒葉時驚
露我居溪之陰早景誠所慕開谿吐初陽獨吟神
與晤豈意方袍人而懷此焉趣忽枉瓊玖章無慙
惠休句

宛陵先生文集卷第九

